



“Aisciuda Ladina” te la paroles di joegn

Ai bec, ambasciadores del lengaz local, e a sia families, ge vegn dedicà la undejeisema edizion del festival del lengaz e de la cultura ladina, metù a jir dal Comun general de Fascia

I **fies**, per prum, e dapò la **mères** e i **pères**. L cher de la comunanza, descheche vegn conscidrà la **familia**, l'é ence l cher de la trasmiscion del lengaz (mère-lenga, dantdaldut), de la cultura, de la tradizions e de la identità e apontin a la familia ge vegn dedicà la **11^a edizion** de l'“**Aisciuda Ladina-festival del lengaz**”, te **Fascia** dai **5** ai **10** de **mé**.

L festival del lengaz e de la identità locala, metù a jir dai **Servijes Linguistics e Culturèi del Comun general de Fascia**, ch'est an l'é out ai bec desche prumes sogec che sparpagnea fora l lengaz, de gra a la **scola**. L'é apontin la scola, tras la politiches linguistiches metudes en esser te chisc egn te Fascia, la fojina de cognoscenza e de sparpagnament del lengaz minoritèr, che l risièa de

Jir dò brea jù per rejons sozioeconomiches e linguistiches che tol ite, a na vida fisiologica, i lengac de mendranza. La joena generazions no l'é demò la miora destinatères per tor ite con consapevoleza n saer - lengaz e cultura - che l'é na esprescion de identità, ma l'é ence chi che dapò à l met de ge l passèr a si fles e de l mantegnir vif tel davegnir. Se i fles l'é i portaousc de l'idiom e de la cultura ladina, i pères e la mères i pel - tras i bec - renovèr sia cognoscenza, se i é fascegn de naa opuramenter, se i stèsc te val ma i rua da foravìa, descorir sia richeza e se fer ite coscita te la comunanza. Ence i **giaves**, desche te etres momenc de la vita, i à na funzion fondamentèla per ge passèr ai nec saeres e valores: l'Aiusciuda Ladina l'é donca na ocajon per duc i componenc de la familia de se meter a confront con sia reijes o de emparèr zeche da nef e da enteressant. Anter la tropa ativètèdes del festival, endrezèdes soraldut te la scoles de Fascia, cater l'é i evenc da no arjumèr, a scomenzèr da “**La bandiera Ladina**”, ai **5 de mé** da les 3 domesdì sul **Jouf de Sela**, anteprema de “l'Aiusciuda” a cura de l'Union di Ladins de Fascia (coriera debant per jir sun Sela). Ai **6 de mé** enveze, da mesa les 6 da sera te sala de la **sorastanza** de la **Scola Ladina** a Poza, l'é la **inaudazion** del **fesitval** co la prejentazion del program, n curt concert de chi che à tout pèrt al cors “**Ciantèr ensema amò più bel**”, n confront anter la generazions “**Canche l ladin ne tegn adum**” e n “**Apericena**” endrezà da la Coprativa Oltre col Projet “Cojinèr ensema”. Ai **9 de mé**, da mesa les 6 da sera, te sala Heilmann del **Museo Ladin de Fascia**, vegnarà prejentà l liber “**La pazienza di sasc**”, co l'intervent de la autora Ierma Sega e de la artista che l'à fat la ilustrazions Michela Molinari e la dramatisazion del liber medemo a cura de Loreta Florian di Servijes linguistics e culturèi del Comun general de Fascia. Per fenir, ai **10 de mé** da les 4 a les 6 domesdì, te la **caserma di studafech de Pera**, “**L'Aisciuda de la familia**”, n domarena de jeghes a squadres per la families, con argument linguistich-identitèr e co la animazion de la sociazion “Inout”.

Per aer maor informazions e per se enscinuèr a la scomenzadives (dant che sie fora i 30 de oril), se pel se oujer ai Servijes linguistics e culturèi del Comun general de Fascia (al numer de telefon 0462 764500 int.4).

Comun General de Fascia
Strada di Pré de geja, 2
38036 Pozza di Fassa (TN)
tel. +39 0462 764500 fax 763046

Elisa Salvi
ufficio.stampa@comungeneraldefascia.tn.it